

# Timotehopi Utipiho Kapiho

## Kimandi 2 Timotehopi Utipimandapi Nesipihande

Porihomi utipihaiwa 13 kiyateti 14 kiyateti jipatipaiwaiwa nyahi isiwasohiwimaiwaami apipaahi ipotiho jipatipaisiho kimore. Ko japihi napwitati ami komi napwitandihandi aimi detitih maipihonji bindataati kimo utipimo jipatipiyahore. Aihi isihiya Romihiyaami awaisiho kiyai iwinjatisiho tipise undihi ko awaisihomi isihiya Porihoai numwaapi tiwawaapo. Tiwauhi ko napotaise. Timoteho biyati andititati bitondaati ami wapa koai uripatitoti napimbipai ko ipihatisamati bitoaitandihandapuni ami isihiya piwiha asiwa nehihaiwa katiwunjohiwaiwaapi winihapipa nunyati anditiwiwati Timotehoai kaundataase.

## 2 Timotehopi Piwiha Napimasataise

Poriho Timotehoai ipihirete undisiha (1:1-2)

Poriho kaundisima naanjwaiwauni ami yaasihaiwauni ami piwiha asiwa nehihaiwauni katiwunjisaihi noaipataise. Siyati saiwa noaipahonihatih Autaahaatihomi piwiha akaaha akitiha Timoteho komi mitiho naingaati ausaati kataunjitandi kaundisiha (3:1-17)

**1** <sup>1</sup>Nini Porihonini Kiraisi Jisaasiho komi otipipatapi natanoaasisihonine. Sandi Autaahaatiho sawaho maaritahi ami gwinyaasirihireti ningisi nanimahanati natanoasataise isihiya Kiraisihopi giwunyaapi koaisawi maasi aimi timaamaitohiyihiyai asiyihiyaimatitawihandi komihetapi numwitandi Autaahaatiho watipitahi katisihaapiha piwiha isihiya nahatiyaisi ausaati kaunditando.

<sup>2</sup>Kinyi Timotehoji Jisasi Kiraisihopi nini kahitonih kopu giwunyaahingitihandaahi kinyi noaipapi nisi maasihonji akohonyamataimbihonjitihi ami nini gi nisi maariho awaindihandi nahinyohihonyapi kimandi utipimandi nini jipatipiyataayo. Isi Apiho Autaahaatihouni ami nyami Awaisiho Kiraisi Jisaasihouni gisi maariho asipihimi ami kinyi gaahapa wapa kamaimbi nehihandi gaahandi kahimi gitamasaihi nga bimitaapi nini piwaunditi gaapundataayo.

**Piwiha Gaaha Waniha Ausaitaapihandapi Gisi Mamaasane**

<sup>3</sup>Jihura nisi asoya Autaahaatihomi ndiheti titihi gaahiya popitihiya bindawaawi Autaahaatihomi otipipati kawisohipatamataindi ami nisangi naasikati kaindi Autaahaatihomi ndiheti titihi gaahonini popitihonini bindataati komi otipipati kiyataayo. Aindi ami nini kinyapi gihunyaati Autaahaatihoi gaahone gaare unditi kaundataayo kinyi Jisasi Kiraisihopi giwunyaahingitihandapo. Aindi ami apatihuni ami otapihaatuni nasisoari nini kinyapi gaapundataayo. <sup>4</sup>Kinyi kinyi kwitipati nuhoaapi gwingitihandapi gwinyaataati ami nini gi gisondandi pihindi waati kinyapi gwinyaataayo ami nini napiti gi gisonataati apipaahi awaindihandi maarititando. <sup>5</sup>Kinyi nga andititipi waati Kiraisihopi giwunyaahingitihandapi isihiya kandauhi atisataati Autaahaatihoi kinyi gaahone gaare undataato. Saimbi kinyi waati Kiraisihopi giwunyaahingitihandamataimi kinyi gaasihaati Roisihaatuni ami kinyi kinaati Yunisihaatuni andititimi waati Kiraisihopi giwunyaapihindare. Aihi ami kinyihetisangi kati kiyati noaipasihi ko kindaramatiyati waati andititati Kiraisihopi giwunyaataise ndi gwinyaataayo. <sup>6</sup>Kinyi saimbi Kiraisihopi waati giwunyaahinihi ami kimikandapi nini aimi gwinyaataati gi sandi kahitataato: Kinyi gaahapa wapa kamaimbi nehihandi nini kinyi mitihoasini ikwiri ahingisohura komi gaahandi Autaahaatiho gi nahimihi kandi kinyiheti ahotindihandi siyati sisiha taati tihili isihiya nausaapi ipohauhi tihwitihiri waati anyaati tihwitipatamatiyati waati anyaati kandi noaipaita kinyi nepi nausaapi ipope. <sup>7</sup>Iyataati kinyi kiwahone mmonipihone. Autaahaatiho Itipiho nyangi nanyamisiho so nyahi isihyaapi mwitunaati yaitihaahomahe. Owetise. So Itipiho nyangi neti anditinyaiwati watipinyamati ami ko nyangi anditinyaihonihi nyahi isihya usaisi akitinihi maariho nunyaati ami ko nyangi neti anditinyaihonihi nyahi yawanaanami bimohitihandi dahopa biyaati jataati isiwatitihahore.

<sup>8</sup>Isi ami kinyi nyami Awaisihopi piwiha ausaitaapihandapi windi mamaasane. Aimbi ami nini Awaisihomi piwihaapi napwititi yaasihandi neti bimohihonisapisangi gi windi mamaasane. Owetane. Mmasitandihandi owetanihi ami kinyi ningisapi maasi naaga yaasihaiwa gi nangoaipahonihi nepe. Nepi kaiwai ipihatimbimape Autaahaatiho neti gi waati watipimahonihi komi otipipati kawitaapo. <sup>9</sup>Nyahi titihi gaahiyaanini Autaahaatihomihyaanimataati komihaiwaahihi kaitihaawi japihi maipihandaatihapi nanyamaasitimandi nyahi wiwa gaahaiwa kiyaati bimonihi kandapi nyasonataati japihi nanyamaataamaise. Owetise. Autaahaatiho nehi sawaho gwinyaati maaritindihandaahi gaahandi kanyisati japihi nanyamaataise. Sandi Autaahaatiho nyangi gaahati kanyindimandi jihi aimihura

kahapaamapipa sangi kaisura Kiraisihomi kaindihandaahi kiyaisi sapa kawindi japihi numwaito tati katindihandisi ami katisiha keti kiyataise. <sup>10</sup>Iyataati wani kimura Jisasi Kiraisiho nyangi japihi nanyamaasiho auta ausaimaninati noaipataise. Noaipasihi ami komi otipipata Autaahaatiho nyangi nyahi wapa gaahapa kamaayaati nehihandi gaahandi kanyindihandisangi auta ausaimaninati noaipataise. Aihi Kiraisi Jisaasiho isihya napwitaatiwihandami watipihandi neti owemataise. Owematosati komi piwiha waniha gaahetapi isihyai kiya napwitaatiwihandi owetati nehi kiya kiyaanihi asitimatiwi jinjapihi bimitaatiwihandi neti ausaimanati nunjataise. <sup>11</sup>Aihi Autaahaatiho komi piwiha (waniha gaaha) kima kaapi ningisi nanimihanataise ka nini isihyaapihi nesi nutandi. Iyati piwiha (waniha gaaha) kima kaisati ningi natanoaasataise nini ka ausaati isihyai kaunditi ami kandunjitando. <sup>12</sup>Ami tanyaaha sikandapi (komi piwiha waniha gaahaapi) nini kimbihhi napwititi bimohipimbihhi yaasati naanjihandi taati netaayo. Iyataati ami isihya komi piwiha waniha gaahaapindiwi yaasati naanjihandi naninyauhi taati nehohitimandapi nini windi mamaanyise. Owetise. Ami nini utaaho giwunyaahohihopi mmoniti gwinyaataayo. Isi ko komi otipipati nisi ikwiraatihi ahaipati nga biyati jatonihhi kati nga ahotimi noti komi Asisiha Awaisiheti Kiraisiho japihi nasonihuraatitaise ndi gwinyaataayo.

<sup>13</sup>Nisi piwiha gaaha aimi kahitohiha namaamapi anitimbi isiwate. Isiwatapa Kiraisi Jisaasihopi baimbi andititipi giwunyaapi ami kinyi maariho Autaahaatihoaisuni isihyaisuni napaitipi nunyapi piwiha kahitotihha naasika isihyai katipunje. <sup>14</sup>Autaahaatiho komi piwiha gaaha isihya nawiho nawihomi anjipipihhi ahiyauhi ahotipatamatiyati kinyi maarihoatihi ahiyatosisiha kinyi nga baimbi jatime. Kinyi sandi saimbi kaime Itipihho Gaaho nyami maarihoatihi bimisiho neti gi anditihihoniho.

<sup>15</sup>Iyataati isihya nahatiya yapipati Esiyaahandaahiya Kiraisihopi giwunyaahohiyihya ningisi aimi nanimasisi niyotihandapaahi kinyi aimi gwinyaapihohje. Iyataati ami utaahuri Kiraisihopi giwunyaasururi Piseraasiyi Emosenisiyaisangi aimi nanimasi naise.

<sup>16</sup>Onesiporaasihoaisuni ami komihusasisuni Awaisiho maariho asipiwisati iwinjatitandi nini nunjeniti gaapundataayo. O ami sandi apaapimahe ko Onesiporaasiho nisi napwitotihandapi mmawitandihandi owetihhi nisi maariho neti winiwati gaahati ningisi ko kanindihandapo. <sup>17</sup>Iyataati ami ko nasati Romihanda noaipati nisapi pihitahi dainjati ipotihura ningisi nisonataise. <sup>18</sup>Ko saindihandapi ami Awaisihoai nunjeniti gaapundataayo asisiha ipotiheti Awaisiho kopi maariho asipiwitando. Iyataati ningisi ko gaahandi pihitahi Epesaasihanda kanindihandapaahi kinyihhi aimi mmonipi giwunyaataahohje.

**Timoteho Kiraisi Jisaasihomi Pwisipi Yaipati Kaitandiho Gaahotane**

**2** <sup>1</sup>Isi ami kinyihi nisi maasihihone, Jisaasiho gisi gaahati kahisati watipihandi waati nahinyane kinyi Kiraisihoaisapi maasi timaamaitingitihandaaho. <sup>2</sup>Iyataati nini piwiha nahatewa kinyuni ami isihya taahiyihyaamuni ndiheti katonih kinyi atimbi aimi nehingiwaiwa usihya usai mmonipinjapi usonipi kiya piwiha akaaha nga baiwi jatiwi isiwatawaawi isihya usaisi nga katiwunjutaatiwihiyai kinyi katipunje ami kiya nesi isihiyai katiwunjito.

<sup>3</sup>Kinyi baimbinihi Kiraisi Jisaasihomi tunipi yahwiningihoni gaahonimatipi noaipape. Saimbi kimati otipimatipi yaasati naanjihandi nyahi aimi newaati bimohipatamataimbi nyangisapi maasi yaasati naanjihandi naitaapo. <sup>4</sup>Iyataati isihya pwisipi yaipa kiyohiyihya otipipati witi witi isihya nehihyaamihatisawi ahoyawi kiyawaamaayopo. Owetise. Nehi titihi japepinjawi pwisipi yaipati kiyohiyihyaamihatih kiyawaayopo kiyaami awaisiho tihaapundati iwinjatisiho kiyai usonataati otipipati titihi gaahati kiyawaayopo tati mmonati kiyaapi maarititandihamwaango. <sup>5</sup>Iyataati ami kimikireti isihya nuhiti isihya usaisawi tusatipatohiyihiyaisangi nuhiti tusatipatitaatiwihandami winihapipa baiwi atiwi nepi kireti kiyawaawaahi usai nusatipihaahotihandapi wapa newaayopo. O ami kapaami winihapipa baiwi minjapepihirawaawaahi wapa windi namehopo. <sup>6</sup>Iyataati ami utaaho wo nandapaapi otipipati biyati waati nawihiyati kaisiho ami nandapa akuraahaihigura jihapihapa kipohipipa ko jihi neti nanataise. <sup>7</sup>Nini wani piwima kima mairima siwipati namihandi katohimaapi kinyi baimbi gwinyaape. Ami Awaisiho kinyi amitiha neti ginjapwaahonih ami gi biyati ginjapwaatonih ami piwima nini siwipati namihandi katohimaami tanyaahaapi kinyi mmonipi gwinyaitaise.

<sup>8</sup>Kinyi Jisasi Kiraisihopi baimbi gwinyaape. Ko aimi napomasihihoi animwaahipatombi Autaahaatiho japihi ahowimasihi asohoematati nepataise. Iyati ami ko isihya awaisiho Daawitihomihyaami jitipatetapi utaahoematati noaipataise. <sup>9</sup>Kima ka piwiha (gaaha waniha) nini ausaataayo. AUSAahonih kima kaapindiwi isihya yaasati naanjihandi ningi naninyawi ami utaahonih ikondihonih maipihonisamataiwi wirihiri watipihira (senihanda) winisasawi nanipuwawaayopo. Ami kiya ningi sanisawaahandi kandi Autaahaatihomi piwihaahi kiya windi nepi wisasawi napupimosopo. Ami isihya usa taawi ka ausawaayopo. <sup>10</sup>Aihi ami kimikandapi nini Autaahaatiho isihya titihi komihiyaimatitaatiwi “siya nisihyaare” tati namihainjawihiyai anditiwiwitandi isihya ningi yaasati naanjihaiwa kihaiwa kihaiwa taawi naninyauhi ami nisi maarihooatih neti anditititi kaiwa nini taati netaayo ami isihya

Autahaatiho titihi komihiyaimatitaatiwi namihainjawihiyaisangi kiya asitimatitaatiwihandi Kiraisihomiheti ahotindihandi naitaatiwo. Nepi kiya koaisawi maasi kiyaanihi jinjapihi bimitaatiwi.

<sup>11</sup> Kima piwima kimbih i yatih sata katisimaapi nyahi biyaati gwinyaitihaawo, “Ami nyahi koaisaati akitinihi maasi napohaawaahi ami koaisaati maasi asihihiyaanimataati bimito. <sup>12</sup> Ami nyangisi wapa yaasati naanjihaiwa nanyoaipahonihi andititaati kaiwaisi ipihatisaamawa andititaati bitotihaawaahi ami koaisaati maasi nyahi kahapaamapipa jaawaati bimito. Iyataati ami nyahi koaisi ahosumwahaawaahi ami koaisangi nyangisi ahosinyamaitaise. <sup>13</sup> Ami nyahi apipaahi watipitaati komihireti japepihiritihaawi piwiha kataatosahandi kandi nyahi komihireti windi minjapepihirisaihi ami kohi komi piwiha katisiha keti biyati japepihirati kaitaise. Kiyataati ami piwiha jihi katisiha namihaatosati ami asaaha jihaati kamaatitaise. Apipaahi owetitaise”, tati piwiha aimi katati ahotise.

### **Autahaatiho Komi Otipipatapi Ahingsihone**

<sup>14</sup> Kinyi nini piwiha gisi kahitohiwaiwa nahateweti isihiya baiwi gwinyaitaatiwi kiyai nusesipapi kaunde. Iyataati isihiya piwiha maatimaatapi nehaha wonya kaniwi katawahonyapaapi piwihaara itihiniwihiyaasi ami kinyi kiyaisi Autahaatihomi ndiheti nepi niwisapupi saunde: Sahi saiwi kaiwi itihimaniwise unde. Saiwi kiya piwiha nehaha katohiwiwa isihiyai neti anditiwiwati iwitatamanihonihi nga bimitaatiwihaiwaamaahe. Owetise. Isihiya saiwa piwiha nehawa atisohiyihiyai kiyaami amitiha gwinyaahohitihanduni ami kiyaami bimohitihandisi neti nusopisasitandihaiwaare.

<sup>15</sup> Kinyi Andititipi Autahaatihomi otipipati kaime ami Autahaatiho gisi gisonataati kinyapi satati ko nisi otipipatiho gaahoe titando. Iyonihi kinyi isihiyaapi yaimbi windi mamaasonihi Autahaatihomi piwiha akaaha kinyi mmonipi tipitapaapi titihi nga isihiyai kaunditaapo. <sup>16</sup> Iyapaapi piwiha maatimaatapi nehahaiwa Autahaatiho gwinyaati ami maaritirihireti minjapepihiriwaiwai nemapi ahosumwape. Piwiha siyati nehahapa isihiyaisi kiya Autahaatihopi nanipimatiwimapi koai namaitaatiwihira daihira numwaasi nohapaaso. <sup>17</sup> Piwiha maatimaatapi nehaha siyahaiwa asaaha awaisiha wiho isihiyaami ambipati neti nanati namasaatimi naipatamatiyahaare. Iyataati piwiha sa katiwunjohiyihiyaami wuri kimure. Wo Aimeniyaasihotihi ami wo Pairitaasihore. <sup>18</sup> Suri utasuri piwiha akaahaami daihira namasisi yandih i bitotamaahure. Kuri piwiha akaahai namasisi naindimandi kuri piwiha satimihuritamaame nyahi animwaahipatombi japihi aimi nepawaahiyaane. Isi nyahi ami windi japihi ipotihura namepaito timi katimihuritamaame. Kurami piwiha saaraahi isihiyaami

giwunyaahohiwaiwa nepi nusopisasamaise. <sup>19</sup>Kuri saihihandi kandi yasiha watipiha mihotirihramatiyaha sapihimi aimi Autaahaatiho mihotise. Sa yasa mihotirireti piwiha sata jipatipindise. “Isihiya siya aimi nisihyaare tati namihainjawihyaapi Awaisiho aimi mmonati gwinyaahore”. Iyati ami piwiha waisangisi sata jipatipindise. “Isihiya nahatiya Awaisihopi satiwi nyahi komihyaanine tohiyihya titihimetihapaisi ahosumwapise”, tati jipatipindise.

<sup>20</sup>Ajaani awaindihandi windaapihi wipati kopuhu nyaihandi kahatamatipetihapa ahondaise. Iyataati kapaami wapa ami anaahipipa isihiya kapaapaahaiwi maaritohipipa gorihandaahuni ami siriwaahandaahuni kaiwihapaare. Iyataati ami kapaami wapa ipataahuni ami yapipataahuni kaiwihapaare. Iyataati ami wipati kopuhu nyaihandi anaahipipa gaahapa gorihandaahuni ami siriwaahandaahuni kiyohipipa sapa nehi usipipaapihura asisiha awaiwaiwetapihapaare. Ami wipati kopuhu nyaihandi ipataahuni ami yapipataahuni kiyohipipa sapa nehihura asisiha nahatewetapihapaare. <sup>21</sup>Isi ami utaaho wo komi maipihaiwa kaiwaanipi namatosati ko noaipati Autaahaatihomi ndiheti titihi gaaho popitihondaataahi ami ko wipati kopuhu nyaihandi anaahipipa usipipaapihura asisiha awaiwaiwetapi anaahipipa gorihanda ami siriwaahanda kiyohipipaamatiyati noaipaitaise. Iyati ko otipipati gaahati kaitaise. Ko noaipati titihi nehi Autaahaatihomihoematati ami Autaahaatihomi otipipati gaahaiwa kaitandi neti timaninataise ami Awaisiho otipipati gaahapa nahataapa komiheti ahionipi ko kapa nga kaitaise.

<sup>22</sup>Wainyihyaami omanititipi maarihoatihapi maipihaiwa gwinyaapi kiyohiwaiwaamihaiwa kaiwaisinipi apipaahandi kinyi asisiha nahateweti ahosumwape. Kinyi nehi titihi gaahaiwaahipi mmonipinjapi nepe. Saiwa gaahaiwa siyahaiwaapito. Kinyi titihoni akitinipi Autaahaatihopi giwunyaapi ami isihiya usaisi kinyi akitinipi maariho nunyapi ami kinyi isihiya usaisapi kinyi maariho ambipati bipi yatipi napaisaatitipi gaatanipi bimitaape. Kimaiwa kinyi isihiya Autaahaatihomi ndiheti popitihya maariho popitihoisawi Awaisiho kiyai anditiwuwati iwitatamanitandi kiya koai piwaundohiyihiyaisapi maasi kaimbi kaiwise. <sup>23</sup>Isihiya amitihya namausesipatahiyaami piwiha wiwa titihimetahaiwa katisaihi kaiwa kinyi atihipi mwitipimbi atimbi nepi kamaatime. Saiwa piwiha titihimetahaiwa katisaihaahi kinyi gwinyaape ami sandipi aimi itihitindaatiwe tipa. <sup>24</sup>Iyataati Autaahaatihomi otipipatiho isihiyaisati itihitindandihandi apipaahi owetitande. Ko windi itihimaatati nehi gaahatihi isihiya nahatiyai kawisati ami isihiya usa koai itihundisaihiyai gaahati kawisati Autaahaatiho gwinyaati maaritirihiretapi biyati kataunjitande. <sup>25</sup>Saiwa isihiya komi piwiha atihomiwi wiretitiwi itihundiwi kiyohiyihyai ko yatipi ipatisanati bipi

napaisaati piwiha kaundati titihemwaitande. Ko siyati kiyonihi ami Autaahaathiho kiyaami omanjitihi otipipati kiyonihi ami kiya wiwa nepemaitiwi piwiha akaaha atiwi nepi iwinjapwaatonihhi ami kaapi mmoniwi gwinyaitaawo. <sup>26</sup> Siya isihiyaisi Bwaasirihiri kirami otipipati kiya kawitaatiwi aimi neti kirami ikihaatihemati mmati isiwatihihyaare. Saiwihyaataawaahandi kandi ami kiya piwiha akaahaapi mmoniwi gwinyaawaawaahi ami kiyai iwinjapwaatati nusesipatonihhi ami Bwaasirihirami wirihiri ikihi namasi yanihimapi nehahaati noaipaitaapo.

**Asisiha Ipotihaiweti Maipihaiwa Kahatamatipetahaiwa  
Isihiya Kaiwi Autaahaatihopi Nanipimatiwimaitaapo**

**3** <sup>1</sup> Asisiha ipotihaiweti isihiya Autaahaatihopi gimaawunyaatahiya naanjihaiwa maipihaiwa kahatamatipetahaiwa kaitauhi ami kinyi gwinyaitaapi nini gi jiji timaniti kahitataato. Iyataati kiya maipihaiwa siyahaiwa kaisaihi noaipaitaise. <sup>2</sup> Isihiya nehi sawanaahihhi maariho naminiwi ami kiya nawihopi maaritiwi akiwisamati ko nawihoi maariho nunyawimapi maipihiyaimatitaapo. Aiwi ami kiya sawanaami ambipatapi tihaapaiwi genaniwi naimaatitaapo. Aiwi ami kiya naimaatiwi maatiimatitaapo. Aiwi ami kiya isihiya usaisi kiyaapi apousonihhi piwiha maipihaiwa kaundiwi itihunditaapo. Aiwi ami kiya kiyaami saniya sapiyaami piwiha windi atihomaawiwi wiretundiwi nepumaitaapo. Aiwi kiyaisi isihiya gaahaiwa kawisohiyihiyai windi saundiwi sahi gaahyaate gaare sanyitihyaate munditaapo. Aiwi ami kiya daahi apipaahi maipitiwimaitaapo. <sup>3</sup> Aiwi ami kiya windi maariho gaaho nepi isihiyaisi maariho nunyawu noaipapi windi naisihiyaimaatitaapo. owetitaise. Aiwi kiya usaapi apousonihhi kiyaapi itihitiwi kiyaisawi itihinawaahura kiyaami itihapipa nepi ipihatiwi yatihipi windi nemapi owemaamaitaapo. Aiwi ami kiya isihiya usaisi piwihaara namatanaataahamataiwi tisatiwimapi kiyaametirihiretapi piwiha jaipipa katitaapo. Aiwi ami kiyaami ambipati maaritimbipa nepi windi yatihemapi maapatitaapo. Aiwi ami kiya tunawaawi isihiya usaisi nepi ainjihariwi tipi nusopisasitaapo. Aiwi ami kiya titihi gaahaiwaapi poundonihhi isihiya gaahaiwa maaritiwi kiyohiyihiyai manditiwitaapo. <sup>4</sup> Aiwi ami kiya kiyaami naisihiyai maipihati kawiwu nepi awusaitaapo. Aiwi ami kiya kiyaami mimaipaiwi gwinyaahohirihireti japepihiritaapo. Aiwi ami kiya nyahi awaisawihyaanini gaahyaaniso tiwi gwinyaitaapo. Aiwi ami kiya kahapaamapipa yapipatambihapaisi maariho nunyawimapi kapaapi maaritiwimapi ami Autaahaathihoi maariho windi namumwitaapo. <sup>5</sup> Aiwi ami kiya nehi yamaati ambipatetapaahuni ami nehi piwihaaraahuni nyahi titihi Autaahaatihopi gwinyaawaati koai mepi autahewaumaati gaapundihaayo tiwi katawaatopo. O ami Autaahaatihomi watipihandi akitihandihhi kiya nepi windi mohopo.

Owetise. Kiya piwiha nehaha taanauhiha katawaatopo. Isihiya siyaapi kinyi nawisapi yandihhi bitose.

<sup>6</sup> Isihiya kimikiya ami kimetahiya daihiraapi daapi mmonipinjawi ahitinji asihiya amitiha gaahandi gwinyaitatiwihandi owehiyaami anjipipihi nandaapi kiyaami amitiha maariho gwinyaahohiwaiwa nepi iwiwatiwi atipati nunyaw iwinjatawaayopo. Asihiya siya maipihaiwa pihitiwi kaiwihiyaasi kiyaami maipihaiwaapi naanawihihiya bindawaayopo. Saiwihiyaasi kiyaami maariho maipihaiwa kaitaatiwi windosihhi ami kiya wiwa kihaiwa kihaiwa tanyaaha owehaiwa dopi kiyawaayopo. <sup>7</sup> Iyataati siya asiya maipihaiwa pihitiwi kaiwi kaiwa aimi numwanahiyaasi kiya gaahandi mmoniwi naitaatiwi nasisoari gwinyaapi kiyawaahandi kandi kiya Autaahaatihomi piwiha akaahaapi windi apipaahi gimaawunyaatonihhi mondaapo. Owetitaise. <sup>8</sup> Jihura utaahuri Janesiyi Jambiresiya Mosesihoai nepi niwisapupi manditiwipatamatawi isihiya siya sandi kiyohiyimiya Autaahaatihomi piwiha akaahai nemapi pohipaiwi manditipiyawaayopo. Kiya kiyaami gwinyaahohitihandi kandinihi neti nopisasinamasihhi ami kiya Autaahaatihopi akitinihi windi gimaawunyaahopo. <sup>9</sup> Iyataati kiya saiwi kiyawaahandi kandi kiya saiwi kiyohiwaiwaapi isihiya gwinyaawaawi kiya nahariho numwaasihhi naharisawaayopo tiwi mondaapo ami jihura Jambiresiyi Janesiya nahariho numwaasihhi naharimi maipihandi kiyamaise tohipatamatawi katitaapo.

### **Timotehoje Autaahaatihomi Piwiha Anitimpi Isiwate**

<sup>10</sup> Ami kinyi ningisapi maasi bindapaapi nini bimaati kiyohiwaiwa aimi mmonipi nepi biyati gihunyaatamahoje. Isihiyai Autaahaatihho maaritirihireti nisi kandunjohitihandi ami nisi daindi bimohirihireti ami nisi kiyohipipaami tanyaahaapuni mmonipihhoje. Aimpi ami nini Autaahaatihopi anditititi akiti giwunyaati ami nini yatihhi ipatisandi nisi maarihoatihhi neti anditititi bitondaati otipipati kaindi ami isihiyai nini maariho nunyati ami anditindi bitondaati yaasati naanjihaiwa nehohitihandapi kinyi aimi mmonipi gihunyaatamahoje. <sup>11</sup> Kinyi aimi gwinyaapihhoje isihiya ningisi nepi mimaipiniwi yaasihaiwa naninyauhi nini kaiwa neti awitimahoniho. Saiwa mimaipiniwi yaasihaiwa aunahipati Andiyokihandaahuni ami Aikoniyamihandaahuni ami Risitiraahandaahuni isihiya naninyauhi nini neti awitimahotihandapaahi kinyi aimi gwinyaapi mmonipihhoje. Kiya saiwa nisi ambipati yaasahaiwa naninyauhi nini nehonihi ami Awaisihho kaiwa yaasahaiwa nini awitimahohiwaiwa nahatewaatihapi anditiniwati tinjaati nanimaataise. <sup>12</sup> Isihiya Kiraisi Jisaasihohaisawi maasi timaamaitiwi titihhi Autaahaatihomihireti maaritiwi japepihrohohiyihiyaisaahi ami isihiya Kiraisi Jisaasihopi pohipaiwi manditipiyohiyihiya kiyaami

ambipati yaawati naanawisahaiwa numwisaihi naitaapo. <sup>13</sup> Isihiya apipaahi maipihya daahi apipaahi maipitiwimapi ami isihiyai jaipipa jaipunditaapo ami Bwaasirihiri kiya sawanai aimi jaipipa jaipundihihyaaso.

<sup>14</sup> Iyataati kinyi piwiha akitiha aimi atimbi nepi andititipi gwinyaahingiha anitimbi isiwate. Piwiha sa gi nyahi katawaahisohiyihyaanapi kinyi gwinyaapihone. <sup>15</sup> Iyataati kinyi kiwahonyapi gihunyaatahona kinyi sangihonjihuraapi Autaahaatihomi piwiha komi utipihooatiji jipatipindiwaiwaatihapi isihiya awitiwi gi katiwihisauhi kinyi nepi gwinyaahingitihandapo. Kinyi sainihi kimireti Autaahaatihomi piwiha sa ka gi gwinyaaitaapihandi nahimihi ami kinyi Kiraisi Jisaasihopi giwunyaahinihi Autaahaatiho gi japihi nangimaataise. <sup>16</sup> Iyataati Autaahaatihomi piwiha komi utipihooatiji jipatipindisiha komi Itipihoo Gaahomi watipihandi otipipati kaindihanda nga noaipataise. Iyati ami piwiha ka apipaahi gaahaasi nyangisi piwiha akaahaapi biyati katanyisitaise. Iyati ami isihiya mimaipaiwi titihimetahireti kiyaami amitiha gwinyaahohiwaiwa neti titihemwati titihi giwunyaati ami nyami dahopa titihenyamati ami Autaahaatihomi ndiheti wapa titihi gaatimbipaapi nyangi katanyisitandi apipaahi gaahaare. <sup>17</sup> Isi sa piwa Autaahaatihomihyaanangi Autaahaatihomi otipipati kawitihaahaiwa gaahaiwaahihiti tisaahiwa nanyinyati gaanyamati ginyunyaati neti nyamanihonihi ami nyahi nga otipipati gaahaiwa nahatewa nga nawihyaati kaitihaawo.

#### Timotehona Kinyi Andititipi Autaahaatihomi Piwiha AUSAPE

**4** <sup>1</sup> Isihiya napomahohiyihyaaisuni ami asiyihyaaisuni kiyaami kiyohiwaiwa ko japihi nasati noaipati Awaisihoematati isihyaaisuni ami kahapaamapipa nahataapaisuni osamati jatataahura tipitapaati usondandihoo Kiraisi Jisaasihomuni ami Autaahaatihomuni ndiheti nini watipindi gi sandi kahitataato. <sup>2</sup> Isi kinyi andititipi mwititipi Autaahaatihomi piwiha ausaapi isihiyai kaunde. Kiya Autaahaatihomi piwiha atitaatiwi maaritiwi timetiwihiyaaro e windi timaametiwihiyaaro tipi kinyi windi gimunyaapi nehi nanihaimbi Kiraisihomi piwiha ausaape. Kinyi isihiyai kiyaami maariho omanjititiji yauripi nusemapiha watipitipi piwiha Autaahaatiho maaritati gwinyaasirihiri kimirete undipi kaunde ami kiya kiyaami maariho windohonihi nepemaitiwi Autaahaatiho maaritati gwinyaasirihireti japepihiritatiwo. Saimbi kiyai kinyi titihepumapi ami anditiwipi. Aimbiki kinyi windi dopi bimitosapi bipi yatihitipi Autaahaatiho maaritimbipa kimbaare undipi mwitipisapi kaundipi katipunje. <sup>3</sup> Kinyi gwinyaape. Asisiha wa kandapiha noaipahonihi isihya piwiha titihi akaaha kiyai Autaahaatihomi otipipatihiya katiwunjohiha windi atihomitaapo. Windi atihomiwi

kiyaami atihiri gwaitati ami maariho maaritati gwinyaasirihireti piwiha nehi kaiwai wiwa wipetahaiwa kiya atitaatiwi maaritohiwaiwa katiwunjitaatiwihiyai numwaapi ahoaitaapo. <sup>4</sup>Saiwi kiyai numwaaposawi piwiha akaahai ahosumwapi namaposawi piwiha nehiihaiwa aripiti yapepiho atihiri mwitipisawi ahiyawai atitaapo. <sup>5</sup>Kiya saisaihihandi kandi kinyihi nahateweti titihi kinyi amitiha biyati ginjapwaatahireti gwinyaape. Aimbiki kinyi kiwahonji baimbi jatinihi naarahaiwauni ami yaasahaiwauni kinyi andititipi nepe. Aimbiki kinyi isihiyai piwiha gaaha waniha ausaapi kaunde. Kinyi otipipati isihiyai anditiwipi piwiha ausaapi kaunditaapihatisi kati kaimbi isihiyai piwiha ausaapi kaunde.

### **Porihonapwitandi Aimi Timendaise**

<sup>6</sup>Ami ninihi nisi napwitandihandi aimi nasati detindaise. Ami nini napwitandi aimi timendaayo. Nini napotaati nisi jitipati isihiya Autaahaatihoai dipumaniwi waapoho wainihandi nuhaahohipataamataindi nuhaasanihi nuhaatitaise. <sup>7</sup>Nini tipipa asitimatitandihandamihapa nga tunnimi napiti wani kimurandaise. Aindi ami nini baindi juhiti napiti otasaahaapihi noaipati namihaataayo. Aindi ami nini nisi Autaahaatihopi giwunyaahohitihandi anitindi isiwatimi napiti wani kimurandaise. <sup>8</sup>Iyataati yamihapataatihi isihiya juhiti nuwi otasaahaapihi noaipahohiyihiyai numwitandi Autaahaatiho katati ahaimbipaamihapa nisapihapa aimi niwatihiti timendaise. Sapa nini naitandi timetimbipa siyahandapito: Awaisiho ningisi sandati kinyi nisi ndiheti titihone ndati ami Awaisiho isihiyai neti titihi tipitapaati usonati usosiha asisiheti sapa nisapi timanati ahaimbipa nanimitaise. Ami sapa nehi ningisaahi windi namaanimitaise. Isihiya ko auta nasati noaipahonihiti usondaatiwi maaritiwi jatimi niyohiyihiya nahatiyai maawi numwitaise.

### **Timotehono Kinyi Nini Porihoningisenda Keti Namme**

<sup>9</sup>Kinyi ningisenda keti kuraanihi namme. <sup>10</sup>Demaasiho kimaapi yapipatambihaiwaisi maariho apipaahi nunyamataati ningisi aimi ko nanimasi naise. Ko ningi nanimasi aunahipati awaipati Tesaronaikaahandaahapi naise. Aihiki ami Kiresenjiho yapipati Garesiyaahandaahapi naise. Aihiki ami Taitaasiho yapipati disitirikihandi Darimesiyaahandaahapi naise. <sup>11</sup>Aihiki nehi Rukiho sawahohi kimbihiki ningisati kimo binye. Isi kinyi keti nasapaapi Maakihoai numwasi maasi nammise ami Maakiho so nini Autaahaatihomi otipipati kiyonihiki ningisi ko biyati anditiniwahoso. <sup>12</sup>Nini Tikikaasihoai aunahipati awaipati Epesaasihandaahapi nandusaaso. <sup>13</sup>Kinyi ningisenda nasapaapi nisi apotihiri utarihiri mwipihiri tiwatihataapihiki aunahipati Tiroaasihanda Karipaasihomi anjipihiki ahiyami nasoni nanesi namme. Aimbiki ami

kapihī nisi utipihaiwa ahiyohiwaiwa nanesi namme. Iyapaapi ami utipihaiwa wiwa kohasipihomi atitata kaiwihaiwa kapihī ahotisi kinyi nanipimimatipi gwinyaapi kaiwai maawi nanesi namme.

<sup>14</sup>Arekisandaaho kahapaamapipa biraasihanda kaisiho ningisi waati wapa yaasihapa kanisati mimaipinise. Ko ningi siyati waati yaasihandi nanopisasindihandapi Awaisiho wihoanjihandi koai ami numwitaise. <sup>15</sup>Isi ami gisangi kopi baimbi jaapo ami ko nyami piwiha katohiwaiwaapi ponje tati nyami piwiha tiwandati nemahoso.

<sup>16</sup>Jihi wuwaninīhi piwiha nisiheti nepi yanutaahauhi nini wihoanjiha kaundohura isihīya usa nisihīhoanji bitotawa ningisi anditinipi wihoanjiha windi kamundopo. Owetise. Nahatiya ningisi nanimasi yandihī nowaayopo. Kiya ningisi saiwi kanisotihandapi Autaahaatihoi sandapi windi gimunyaape kiya saiwi kiyohitihandi nepumape unditi nunjeniti gaapundataayo. <sup>17</sup>Kiya sanisauhīhandi kandi Awaisiho nisihīhoanji deti bitonda ningi anditiniwataise. Anditinihi nini anditindi bitonda piwiha gaaha waniha nga ausaataayo. AUSAHONIHĪ isihīya Autaahaatihopi windi atihomiwi gimaawunyaapihiya atisawaayopo. Iyauhi Awaisiho suhiri ainjihirihirami maahomwaanapi ningi tipindamati japihi nanimaataise. <sup>18</sup>Sikiyati Awaisiho ambipati yaasihaiwa isihīya ningi naninyohiwaiwaatihapi japihi nanimaitaise. Nanimaati niwatimi noti nanimaasi ko ninjaati bimitandihapihi yamihapataatihapi naitaise. Isi nyahi kopi waati maaritaati koai newa nepi autaahemwaitihaawo. Akite.

<sup>19</sup>Nisi asisiha gaahure hitotihandi nepapi PIRISIRAAHAATISUNI Akwiraahoaisuni ami Onesiporaasihomihusasisuni kaunde. <sup>20</sup>Erasitaasiho aunahipati awaipati Korindihanda namaasati daahi binye. O Tiropimaasiho timbipa nesihī aunahipati Mairitaasihanda kapihimapi naso. <sup>21</sup>Kinyi ketinīhi namme. O kinyi wonji otihī jatapaapaahi mbipa mbwaati itipihō aungwohandi noaipahonihī kinyi windi namaapitaino. YUPURAASIHOUNI PUTENJIHOUNI RAINAASIHOUNI KIROTIYAHAATUNI ami usa Kiraisihopi giwunyaahohiyihīyai maawi gisi asisiha gaahure hitawaatopo.

<sup>22</sup>Awaisiho kinyi maarihoaisatitane. Iyati ko sahi nahatiyaatangi gaahati kasisati jainjatane.